

حوادث عیال
موتوں کی

مراد ماہر

حواديت عيد موكولس

مراد ماهر



الترقيم الدولي : 3 - 039 - 493 - 977 - 978 : I.S.B.N:

www.shams-group.net

تصميم الغلاف: محمود ناجيه

إلا بعد الحصول على موافقة كتابية من الناشر

إلى أبي وأمي وإخوتي وأبنائهم...

أحبكم وأعشق النظر إليكم من بعيد

"من فوق أرضي"

إلى غريبت ..

استطاعت اختصار النهايات واختزال كل النساء

في جذوة من قبضت أجمال.

... دعينا نستقطب معطيات الفرحة

نتناسى أجنون لنزداد جنونا

ونستدعي الاختلاف لنحيا لا شبيه لنا.

إلى روحها ...

تلك التي قيدت المرضى

وأهدته أسيراً إلى قلمها .

"نعمات البحيري"

إِوعَى تَنَام ...

سَاعَاتْ بِيكُون النّومْ أُخْر مَسْمَار فِي دِمَاغِ الْحَدَوْتْ .

وَالْحَدَوْتْ دِمَاغَهَا صَغِير ...

قَدْ الْعَمَر

المقدمة

في كل مكان، وفي كل أوان؛ الناس محتاجة للحواديت، مش عارف
ليه، يمكن علشان يهربوا من حكايات تانية، يمكن علشان يجروا
ويّا شخوص الحدوتة في لعبة زي القطة العامية، ويمكن علشان
في الآخر يخرجوا لسانتهم للحدوتة، ويقولوا بعلو الصوت مع
ضحكة خليعة شوية:

"مش إحنا، معرفتيش تطولينا".

والله ما انا عارف يا اخوانا مين لحظتها راح ببيكون ضاحك على
مين.

جدي قبل ما يصبح حدوتة من ضمن الحواديت اللي في بيتنا،
واللي بتتخزن في الغالب جوه شفايف أمي، كان بيقوللي:

"ما تيجي يا واد يا صغير تحكي لي حدوتة، شكلك عفريت".

وأرد عليه باستغراب مدروس وأقول له:

"أنااا يا جدي، أحكيك حواديت؟ ده أنا لسه صغير باهرب من سيرة

العفاريت، استنى أناديك أمي".

ويوقفني بطرف صباعه العيان ويقوللي:

"لأخليك روح أنا لأمي"

وشوية ... ومات.

اللہ یرحم موتانا.

شفتو.. ضحكت عليكم وحثيت حدوتة.

القصـد .. نـعود .

فكرت كثير وكثير عن عشق الناس للحدوة، ويا سلام لو كانت متحبة بشوية مزيكا، تعالى وتوطى والناس تفرح فوقها وتزعل تحتيها.

قلت يا واد يا "مقامه" طب حاول تسأل حد من العلماء، علما الحواديث، يمكن يدريك رد أكيد تخلص بيه وتقوم.

ف لقتني باروح لأمي المشغولة بوابور الجاز وعيدان الكبريت، وترد علياً وهي بتضحك وتقولي:

"طب خد قشرلك حبة توم".

يجمع ... راح أقشر توم؟

تولع حواديت الدنيا لو كان تقشير التوم من محاسبيها.

ولاقیتى بزق مش عاااايز.

لوكامية في نن عنيا خلت نن عنيا الثانية تقعدني، بالعافية تقولي

"اقعد يا حمار انت الفايز"

آه با بنت النصابة يا نن... مش عااليز.

بيني وبينكم قلت وماله نسمع برضه رأي الخبرا في الموضوع.
أمي تقول من غير ما تبص لخلقة أهلي:
"يا بني الحواديت هيا الدنيا، والناس اتولدوا لقوا نفسهم بيحبوها،
ورغم العشق ده كله ما بين الناس والدنيا دايمًا عايزين ينسوها.
أصل الدنيا منها علاجها وفيها دواها، حتى لما بنلن أيامها ونقول
احنا بنكرها، بنلاقي حكاية أو اتنين تفاصيلها تجن، فيها كتير من
ملاحنا وفيها كتير من كل المخزون من همّ".

تقريبًا أمي نسيت تقشير التوم، تقريبًا نسيت تحرق غدا أبويا.
سحبت ايدي على أوضة جدي المقفولة، وعطنتي كتاب مكتوب
على بابيه "دنيا الحواديت"، وقالتلي:
"واحنا صغار قاللنا جدك إن العنوان مكتوب بالشقلوب، يعني
الكلمة الأولى مكان الثانية يا حبوب".
قلت:

"وماله يا أمي مش فارقه كتير".

ضحكت أمي وقالت:

"أغبي من أبوه بكتيييير".

الشاهد...

خدت كتاب جدي وجريت لبعيد، حالف بمقام سيدنا أبو عزام لافهم
كل المكتوب وأفض بكاره كل جديد.

حواديت جدي كانت زي الغنيوة اللي بنسمعها في ليلة المولد،
بيغنيها كبار لابسين زي شيوخ الجامع، عمة وجبة وكمان ققطان.
والناس تصرخ من حوالهم الله.. الله.. عيد.. فان والنبي فان.

ليلة المولد في بلدنا دايمًا كانت ليله صُبُحها جمعة، والناس تستنى
الليلة يمكن أكثر م العيد.

أمي بتدبح وزه سمينه تبدأ تظغيطها قبلها بشهر، واللمة الحلوة
حوالين الوزه بتخللي ستي تقول في ودانا؛ والوزه بتقطع"
شي الله يا بخوري".

راح يتريق واحد من حضراتكم ويقوللي: "بخوري؟".
هسسسس.. إوعاك تنطقها، أحسن تصحى تلاقى عنك في أفاك،
كل ما تتقدم ثانية ترجع دقيقتين لوراك.

أصل "بخوري"؛ أقصد سيدنا بخوري؛ لما بيعضب على واحد م
الجُهل بيعيش اللي بيتبقى في عمره محتاس عمّال على بطل..
على فكرة ده كلام ستي فهيمة.

ست الستات كنتي والله يا ستي، فهمانة ف كل صغيرة وكبيرة،
مش عارف ليه كان بيخاف منها الرجاله، حتى المأمور والعمدة
كانوا ببيجوا في الأعياد ويودوها.
وأنا مالي.

نرجع بأه ثاني لجدي الـ كان مشغول بكتاب الحواديت، وسايب ستي تبقى كبيرة العيلة.

جدي كان بيحب الست نعيمة فراشة الوحدة الصحية، صحيح إنها وقت الزنقات بتكون دكتورة، بس الناس في الأول والآخر كارهين مياعتها ومياصتها، لدرجة إنها كانت ممنوعة تخطي عتبة دارنا. ستي كانت بتقول: "عتبتنا الطاهرة متعتهاش بنت الـ.....".

أمي كانت بتقول على ستي إنها مرا قادرة وجامدة وبميت راجل، علشان كده قررت في يوم؛ مش فاكتر ترتيبه في وسط الشخابيط اللي في عمري؛ إني أحول ستي لست وتحكيلى حدوتة. بس إزاي؟

دي بتكره كل الحواديت واللي بيحكوا الحواديت، وبتكراه كل ولاد أولادها عشان بيحبوا التوتة توتة... ..

طب أقولكوا سر على النوتة؟

كانت بتزقق لأمي لو لقيتها ماسكه كتاب، وبتفرح موت لو لقيتها بتطبخ أو ماسكة الفوطه.

طب شوفتوا الكارثة؟..

سطح البيت كان فيه عنباية، جدي حط في وسط التكعيبة كرسي قديم من نوع طلسيم، رجل الكرسي القدامانية كانت أقصر سنة من اللي وراها... ستي في يوم طلعت فوق، عرفت بالكارثة، وكان

الحل يليق بالحادثة، حطت حطة ونص من كتب الحوادث تحت
الرجل الزعلانة م الأرض، صالحتهم على بعض.
يومها جدي لطم على خده زي النسوان، وقعد يصرخ ويفر فر زي
العيان.

يا عيني يا جدي، كان لما يشوفها يقول:
"الست فهيمة دي أكثر واحدة بتفهم في الدنيا".
الله يرحمه.. عاش في عذاب، ومات كذاب.

آسف جدًّا..

نرجع تاني لمرجوعنا، الحيلة اللي عملتها على ستي عشان
تحكي لي الحوادث..

أكثر حاجة كانت بتأثر فيها سيرة الناس الصالحين، ستي كانت
بتصلي الخمسة، وتصوم اتنين وخميس، وف فجر الجمعة تقعد
وسط الأموات تستقبل نور الدنيا بقراية الفاتحة وياسين.
على فكرة أحيانًا كانت تحفظ قرآن وساعات ترفع صوتها وهي
بتقرأ، يسمعها اللي في آخر الشارع.
كانت بركة.

والبت "جرادة" الشغالة كانت زنانة وحرّكة، ودايمًا كانت لما تحب
تنرفز أُمي تقول:
"ستي فهيمة دي بركة".

تقدر أمي ترد عليها ؟ أو تشخط فيها ؟ أو تضربها ؟
فوراً حتقوم الحرب العظمى ما بينها وبين ستي فهيمة، والحرب ما
بينهم شبه الحرب ما بين بريطانيا العظمى وحي بولاقي، لا الأولى
بتقدر تمحيها، ولا أمي بتقدر تمحي الكره اللي بيملا عنيا.
والبت جرادة بتفرح بالحرب الباردة ما بينهم، وبينها وبين نفسها
بتضحك وتقول: "أرزااق".

وأنا برجع أدور حوالين ستي، مره أبوسها، ومره ألاعب ايدي
الهبلّة في شوارع بين صوابعا، وبنادي عليها :
- ستي يا ستي ..

وترد علياً : "قول يا روح أمك"

- سيدي الجارح جاني في منامي امبارح.

- "وحيااة أمك".

ف جريت.

حبة تفوت وشوية يعدوا...

ستي فهيمة هديت وناديت لي، وقالت:

"شكلك كده كداب مش نافع، شكلك شارب حُبّ الحواديت من

سيدك، شكلك شبه أمك متسهوك ومنسون وملّوع".

يا نهار كحلي، ستي فهيمة بتكرهني، عرفت إني موالى لحزب

الحواديت المايح.

يا نهار موحول، الخطة اللي قعدت ليالي بخطط فيها وأغديها
طلعت مفقوسة؟ سهوكتي اللي بتحبي ناحية ستي طلعت مهروشة؟
الله يجازيكي يا دماغي، راح تعملي إيه؟
طبعا عارفة، مش حعرف أعيش في الدار بعد ما ستي هرشت
نصبايتي عليها..

مش حعرف أضحك تاني ولا ألعب تاني في نواحيها..
مش حعرف أغني غنيوة كنت باصحي بيها الدار في الفجرية..
ولا ألعب بالكورة في حوش الدار في الضهرية..
ولا أقعد من بعد العصر قدام حلة أمي أمصمص في العضم.
وأكيد مش حقدر أمدد تاني في العنباية بتاعة سيدي أسمع حواديته
وقت الليل ما يموت نور الشمس..
ولا حقدر أتأوب على حجر أمي، وأبويا فرحان بيا وببيوسني وقت
الليل ما يكون لابس ضلمة، وعامل زعلان عالشمس..
وأكيد مش ححضر تاني مولد سيدنا بخوري..
وأكيد مش حشخط تاني في البت جرادة.
آآآآه، بنت الكلب الجربانة، راح تشمت فيا وتجري ورايا ف وسط
الدار وتقول:

"ما توسخش الأرض، أنا ماسحة".
إلهي يولع شعرك يا بعيدة يا ماسخة.
راح تعملي إيه يا دماغي .. راح تعملي إيه يا دماغي.

آه، أعمل عيان .
والله فكرة، أعمل عيان ..
وقفشت في بطني وصرخت بعلو الصوت؛ زي ما بواب متعافي
يقفش في حرامي هربان .
آه يا بطني.. آه يا بطني..
اتلمت حواليا الدار، أمي بتصرخ م الرعب عليًا، وجدي أول حاجة
نطق بيها: "ننده للست نعيمة".
وأرد عليه في دماغي:
"وده وقته يا جدي؟"
إيد ستي فهيمة ظهرت فجأة ورا عمة جدي، وطاااخ...
"ستت نعيمة يا كرمانى؟.. خليتها الست؟.. وبتعصى أوامري
وتحلم إنها ممكن تدخل دارى؟!".
ما قدرتش أمسك نفسى، ونسيت بطني وأمي وجدي وستى، وقعدت
آأضحك، آأضحك.
ودي كانت آخر مرة أضحك فيها من غير ما أتألم.
كل ما آجي أقعد واعمل حمام بتفكرنى اللسعة اللي ورايا بستى
فهيمة وهي بتلعب بالنار في "اللامؤاخذة".
... سامحونى مقدرتش أنسى.
على فكرة، أنا بعد ما خلصت الجامعة، خطيت ورقة فيها بلاغ عن
ستى فهيمة لكل الجمعيات الأهلية.

من يومها حلفت ما حسمع ولا حطلب حدوتة من حد .

آه... .

حكتب كل الحواديت اللي بشوفها واللي حشوفها..

حكتب عن دارنا، عن ظلم الست فهيمة لسيدي كرمانى..

عن طيبة أمي الشقيانة طول اليوم في الحله الـ"قعرها" محروق..

عن جدي الهيمان في الست نعيمة المايصة..

عن أبويا؛ اللي لحد السطر المكتوب مش متخيل حدوتة على

مقاسه..

حكتب عن كل الناس المبروكة، عن مقاماتهم، عن موالدهم، عن

كرامات عمري ما حسيته غير في عيون ستي والبت جرادة.

حكتب عن أمي اللي تصوّت لما أخوها يموت، وتصوّت برضه لما

يموتلها دكر البط!.

حكتب عن جهل الناس في بلدنا بالفرق ما بين الدين والعيب.. ما

بين الدقة اللي في قلب الخايف، والرعدة اللي في عين المظلوم..

ما بين الفاس العرقان بدموع الأرض، والفقر اللي بينحر في

عيدان الجلايب.

حكتب عن غفرا بلدنا الواقفين قدام النقطة ببندق شبه النبائيت،

شنباتهم أقواس ودواير حاجزة وراها الخوف من عقل النبي آدم

لما ينور.

حكتب عن أصغر تفاصيل في عقولهم، اللي بيحلفوا في اليوم ميت مرة إنها أكبر بكتير من كل الدنيا.

حكتب عن أفرح نوع عرفوه من أنواع الفرحة، لما ببيجي الواد على ست بنات.. عن أحزن نوع عنديهم من أنواع الحزن، لما تموت الأم وهي بتولد بت ولسه ما جابتش الواد. الأغرب إن الدمعه في الحالتين بتكون الحل المعتاد.

حكتب عني وعن نور الصبح اللي وانا صغير كنت بقول:
"هانت، كلها كام حلم وحصى ألاقيه قدامي ينورلي اللي اتبقى في عمري".

م الآخر قررت أغيط ستي فهيمة وأكتب حواديت.

حكتب حواديت

إِوعَى تَنَام ...

لِحَسَن تَصَحَّى تَلَا فِي عَنِيكَ عِيَانَةً ..

فَمَتَّعَ فَشَن تَعِيطْ

الحدوتة الأولانية

المنظر من بلكونة دارنا يجنن يا اخوانا .
وقبل ما نسرح في الحدوتة، واجب إني أنبه حضراتكم " ما تعدوش
كلمة بلكونة بالساهل " .

آخر حاجه كان يفهمها الناس في بلدنا يشوفوا بني آدم واقف فوق
سطح الدار، بيخزن حبة غلة أو بيوزع بالعدل أقراص الجلة على
نور الشمس.. وآخر حاجة كان بيقولها أهل بلدنا عن البلكونة :
" أوضة مفتوحة بنلمحها فوق قصر محمد بيه الراجح متعلقة من
غير مسمار " .

على فكرة، محمد بيه الراجح يرجع أصله لسيدنا الراجح، وسمعت
كلام إن البلكونة كرامة من وسط الكرامات اللي ورثها وخلته جبار،
أغنى واحد على مرمى نظرهم، والنايب عنهم بعد ما كان أحقر من
أصغر صرصار .
سبحان الوهاب العاطي .

الشاهد...

المنظر من بلكونة دارنا يجنن يا اخوانا، عامل زي اللوحة اللي
بيرسمها عيال؛، ربنا يلطف بينا وبيكم؛ عنديهم حاجة عبيطة في
دماغتهم، ممكن يرسمك ساقية جنب البحر المالح، ممكن يرسمك
شمس شعاعها أوطى من كعب الكتكوت، ممكن يرسمك مصنع أكل
مكنه بيدور بقوالح.

المنظر يبدأ بالشجرة اللي على شمال الدار، الناس بتقول إن الراجح
هو اللي زرعها وهو صغير، ونحت على جذع الشجرة كلمة:
"سبحان الله".

الرايح والجاي يتمسح فيها لجل البركة تحل عليه.

قدام الشجرة تل زباله بيعلا عن الأرض مقدار طول عشرين عيل
واقفين فوق بعض.

وف وسط التل ممر نضيف وطويل في نهايته سور عيان بيحوط
على سيدنا الراجح، وجنب السور م الناحية الثانية خرابة كبيرة
لماتشات الكورة.

وف آخر المنظر من فوق بتشوف المادنة العالية بتاعة الجامع،
بيقولوا ده أكبر جامع في الدنيا، وكمان الناس لما بترجع م الحج
بتقول إن الجامع ليه أخ هناك.

أكثر حدوتة غريبة عن الجامع موضوع الكنز، اللي الأرض الـ
"حواليه" تنشق عليه مرات معدودة ف عمر الدنيا، واللي يصادف
ويعدي من جنب الجامع لحظتها راح يبقى قارون.

طول عمري وأنا صغير كنت بحب أقعد باصص ع اللوحة اللي
رسمها عيل مجنون.. مش علشان أتفرج ع الناس اللي بيتباركوا
بشجرة دارنا، ولا علشان النسوان اللي ببيجوا مع الفجر لسيدنا
الراجح يطلبوا منه الخلفة أو طولة العمر لعيل بيموت، ولا علشان
الكورة اللي بتهرب لأقرب لمبة جاز وتكسرهما، ولا علشان ألمح
كنز بيخرج من تحت الجامع.

كنت بحب المنظر علشان أتفرج بعد أدان المغرب على عيل أكبر
مني بشبرين، بلاقيه يخرج من خط ييفصل بين النور والضلمة من
جوه التل.

وأسأل أمي وأسأل ستي، والبت "جرادة" ترد عليًا :
"عيل ملهوش أهل".

وقالتلي كمان إنه حرامي.. طب ليه يا جرادة...
ترد تقول :

"معرفش... شكله كده مش سهل".

مش عارف مين سماه فارس، بس لاقيتني بقول له في سري يا
فارس، ومحدث في بلدنا كان يعرف فارس قدي، ومحدث كان

يعرف مواعيده لما يخرج من وسط زبالتة قبل المغرب، ولا لما
يبرجع ليها قرب الفجر.

كان يلمحني في البلونة ويضحك، مش بالظبط، أنا كنت بشاور،
كان بيرد بربع سلام مع حة ضحكة.

كنت بحبه.

حيرد أحننا اللي بيقرا الحدوته، طب ليه؟.. فيه حد يحب الـ باني
بيته في تل زبالة؟

راح أرد عليك :

مش عارف ليه أنا كنت بحبه، يمكن حسيت إني بشوف حدوته
بتخرج من جوه اللوحة، بتبص عليا، عايزاني أبص كويس في
الألوان.

ويمكن حسيته مش زي عيال الحواديت ف كتاب جدي المتشقلب،
يمكن علشان من غير أم، يمكن علشان مش بيروح المدرسة
ويانا، حسيته غلبان.

فارس عمره ما صاحب حد، فارس عمره ما خد ولا باع من حد،
كان زي العفاريت اللي بتسقي زرع الحواديت، كان عند الناس
مبيفرقش كتير عن حة في تل زبالة.

لكن لما ببيجي أوان المولد، الناس تحترمه، بالذات النسوان،
ويقولوا :

- "فارس هو الحارس اللي بيحرس سيدنا الراجح".

ويقولوا كمان:

- "فارس بتحل عليه البركة".

أغرب حاجة إن الواد فارس عمره ما حضر المولد، ولا ركب المراجيح، ولا لعب البمب، ولا حتى زار صاحب المولد.

وف يوم قبل الفجر ما يدن بشوية، صحيت م النوم على صوت طلقات النبايب اللي بشوفها على اكتاف الغفرا، ووقفت على البلكونة أتفرج.

كنت أسمع إن الغفرا بيقتلوا في كلاب الشارع، بس دي كانت أول مره أفقشهم.

المنظر كان مش واضح خالص، العتمة بتخفي وشوش الغفرا، وكلاب السكة بتهرب ناحية أكوام التل، وصوت الضرب ما يببطلش.

وأسمع أصوات الناس جوه بيوتها بتفتن على كلب أو اتنين وتقول:
- "يا غفير مختار.. فيه كلب بينبح في الجيهه القبليه جنب الدار".

شوية.. والناس كلها صحيت من نومها، والناس وقفت قدام عتبات دارها، والناس تفتن حبة وتضحك حبة، لحد ما مات الصوت اللي بينبح.

وانا واقف في البلكونة أتفرج بعد الغفرا ما مشيو، وبعد ما نام الناس على جثة كلبة اختارت عتبة دارنا عشان تحكيها نهاية الحدوتة... يمكن كانت بتقول كلنا حنموت، حسيت إني بموت وياها، وقريت على روحها الفاتحة.

ودی کانت اول مره اُسمع صوته.

والمنظر كان واضح جداً بعد الصبح ما شقشق.

فارس لحظتها زود خط جديد وسط خطوط اللوحة المجنونة.

عيل أكبر منى بشيرين بيعيط، عين بالمية وعين بالدم.

ستي فهمية صوتها بيمسح كل الألوان :

- "انت يا موكوس خش نام".

أمي كمان بتخاف منها ومن مشاكلها واسمع صوتها يقول :

- "خش يا واد لحسن تستهوى".

فارس سامع صوت النسوان الشريرة، جرجر نفسه بعيد وبعيد،
أبعد من حتنا، وأبعد من كل بلدنا.

من يومها وببيت فارس مهجور..

من يومها واللوحه يتيمة محتاجة لنور.

من يومها باقف فوق بلكونة دارنا ليلاتي بستنى عشان أتفرج بعد
أدان المغرب على عيل أكبر مني بشبرين، يمكن يرجع يخرج من
خط يفصل بين النور والضلمة من جوه التل !.

إِوعَى تَنَام ...

لِحَسَنِ تَحْلَم مِنْ غَيْرِ مَا تَحْسَن ..

وَالْحَلَمَ الَّلِي مَا يَصْرُخُشْنَ فِ وَشَكَ بِشَجَاعَةٍ ..

مَمْلَكَن جَدًّا يَبْقَى هَلَاكَل.

الحدوة الثانية

مولد سيدنا بخوري، أكبر مولد في بلدنا، مراجيح ياما، عربيات
بمب المرصوص قدامها نبابيت زي بتاعة غفرا النقطة، والمسؤول
عنها بنات من برة بلدنا مايصين بالفطرة.. وبيتقال مشيتهم بطالة،
وبيتقال بيروحو ليلاتي لقصر محمد بيه الراجح وليبيت العمدة.
ستي فهيمة بتقول إن نعيمه فراشة الوحدة الصحية مصاحباهم.
وأمي ترد عليها :

"حرام، منحوضش ف أعراض الناس".

ستي بتضرب كف بكف وتصرخ وتقول :

"بتردي عليا يا شلبية، بتردي يا أم الموكوس المحتاس، والله اللي
يدور يلاقيكي معاهم".

وأمي بترقع بالصوت الحيائي ف وسط الدار، وأنا بفرح أوي لما
الحرب ما بينهم تبدأ.

وبداية الحرب ما بينهم معناها إني اهرب ع المولد ييجي ساعتين،
وأرجع بعديهم متسحب وسط النسوان اللي بيتلموا عشان يصلحوا
بين الاثنين.

وأول ما أخرج من دارنا أجري على عم فاروق.
عم فاروق كان من مصر، من حتة كان بيسميهـا "السبتية"، بيلف
الدنيا من أول فوق ولآخر تحت، ويرجع من تاني في معاد المولد.
يرجع صاحب في إيديه اللعبة النصابة، لوحة كبيرة يعلق فيها
صناديق معمولة من الكرتون والصناديق مرصوصة بترتيب الأرقام
من واحد... لكتيبير، قول مليون.

والصناديق مليانة جوايز، مش بالظبط جوايز، كانت بالنسبة لي
مليانة أحلام وظنون.

وف إيده جراب جربان مليون أرقام بأسامي الصناديق. وعم فاروق
بينادي في وسط المولد:

"حللي بقك ... دور ع الصندوق المجنون".

وبيتم عليه كل عيال المولد.

عم فاروق كان دايمًا بيحجب وياه بنته، واستنوا الصدمة الجاية..

بنته اسمها إيه ???

حد يخمن ؟

بنته اسمها "مصر"، طب والنعمة مسمى البت قال إيه مصر.

أول مرة قال قدامنا الاسم ضحكت وقلت لعشرين عيل كانوا واقفين
حواليه :

"بيهزر، تلاقيه بيهزر".

ولاقيته مكشر، فضحكت وقلت :

"وماله يا عم فاروق، الاسم جميل والله، ده حتى جديد ومسكر".

اللي يزعل إن البت المقروضة كانت هبله، مبتعرفش تفك الخط ولا
حتى تساعد عم فاروق وتشغل وياه اللعبة.

اللي يزعل أكثر إن أنا حبيبتها، أصل مجرد إن الواحد يتعرف في
بلدنا على مصراوي يبقى اتفتحتله طاقة الأبهة والعظمة، يقعد
يتباهى في وسط الخلق ويحكي ويتحاكى عن شوارعها وعن
ميادينها وعربياتها وعن نسوانها - اللهم احفظنا - العريانة.

اللي يغيظك إنك لو دورت وراه حتلاقي صورة مصر في عقله
بيرسومها من حكايات الراديو اللي في دكانة نبوية الفتانة.

أول ناس أعرفهم من مصر كانت "مصر" وعم فاروق.

أول بنت لاقيتها بتضحكي؛ طبعًا غير البت جرادة؛ كانت مصر.

أول حد أتعشى معاه حواريت مش حمضانة كان عم فاروق.

كنت بيعط لما بيحكي حكاوي عن الناس اللي بتتغرب وبتتسابق ويّا
الموت لجل اللقمة، وعن الناس اللي بترجع تتقابل من ثاني ويّا
ماضيهم بعد الفرقة.

كنت بعيط لما بيمسح بإيديه الدمعة وينضف وشه بمسحوق
الضحكة الكدابة.

كان على طول بيزعق في السما ويقول:

"استرها يا رب.. ده احنا غلابة".

اللعبة بتاعة عم فاروق كانت غالية شوية، بقرشين، بس أنا رأيي
إن فلوس الدنيا تهون لجل الحلم النائم جوه الصندوق المجنون.
عم فاروق كان لما يشوفني يقدمني على كل عيال المولد، ويمد
إيديه بجرابه، ناحية إيدى. وأقعد أفصص في الأرقام وأحسس في
خطوطها من تحت لقدام.

كان كل عيال المولد بتقول العشرة هي اللي بتكسب، وبعد ما
أحسس وأفصص واختار ورقة وأقرأ عليها كل اللي حفظته من
القرآن تطلع إيدي بورقة، حاضناها وخافياها عن كل عيون
الواقفين.. يمكن خيفة من الحسرة ويمكن خيفة من العين.

وعم فاروق كالعادة يكرمش عينه ويضحك ويخلص بإيديه الاتنين
الورقة من حضن صوابعي الخافين. وأفضل باصص في عينيه
الساكتين يمكن ألمح فيهم عشرة، يمكن عينه تقوللي كسبت.

عم فاروق كالعادة ييفتح صندوق مش عشرة، ويهتف في الإيد
المهزومة: "حللي بقق".

- أرواح ؟!

تاني يا عم فاروق، أدفع قرشين في اليوم وآخذ بيهم أرواح، نفسي
يا عم فاروق أكسب مره قبل أوان اللعب ما يخلص، نفسي أكبر
وأفأخر مرة في وسط عيالي إني لمست العشرة بإيدي، إني كسبت
فلوس.

كنت بحس بجد في لعبة عم فاروق إني زي ما بتقول ستي عليًا
"عيل موكوس".

عم فاروق كان دايماً يضرب مصر، كان دايماً يهربها من الضرب،
كانت صعبانه عليًا، وبتصعب أكثر لما تقول لأبوها :
"جعانه يا بابا".

فيرد عليها بشلوت يعصر نن عنيتها عصر.
كلمة بابا دي كانت في ودانا شبه الحاجة الجاية من مصر، شبه
العربيات اللوري، شبه الراديون، شبه التلافون اللي ف بيت العمدة،
شبه الناس الراجعة من عند رسول الله لابسين أبيض ف أبيض
وبردك بيقولوا شي الله يا بخوري.

بس أنا عمري، عمري ما حسدت البت إنها من مصر، وعمري ما
اتمنيت إني أنا دي أبويا وأقوله يا بابا.

حسيتهم كده مش زيينا، حسيتهم زي كلوب الزينة، حستنا كمان
أحسن منهم، وأحسن من كل الناس اللي في مصر.

طب أنا عمري ما قلت لابويا أنا جعان، قبل ما افكر أنطق بيها
بيطل الخير اللي في دارنا يلجم بقي بنعمة ربى علينا ويفيض على
كل اللي يخطط على باب الدار ويقول أنا غلبان.

بس أما بفكر وأفكر، بقول مصر أكيد غلبانة، ذنبها إيه إن أبوها
مجوعها، ذنبها إيه انه ذالها ومبهدلها في بلاد الله، لا نومة
مريحة، ولا هدمة نضيفة، ولا أم تريحتها.

البت كانت تهرب من صناديق أبوها، وتقعّد ويايا شوية جنب
المرجحة الشطاحة، كات بتعيط وتقول:

"أنا زي بنات الدنيا كان ليا أم، مش فاكرة الصورة اللي اترسمت
ليها من سنتين ويا الاسم في عقلي، بس أنا فاكراها.. كانت حلوة.
هربت منينا لما أبويا رماها بوابور الجاز في عنيتها، وشها
كرمش، ورموشها اتحرقت".

والبت تعاايط، وأنا أعاءايط.

والبت تقوللى :

"إوعاك يا مقامه تولع في عنين حد، إوعاك تولد بت عشان تكرها
وتجوعها وتعريها في وسط الخلق"

وأنا من جوايا برد عليها :

"كنتيش إنتي اللي ولعتي يا هبلّة، وأنا ناقص، ستي فهيمة تبكيني
في الدار وانتي كلامك كره ونار"

حسيت إني راجلها، وقلت في ذات بالي:

"يا واد يا مقامه ما تتجوزها !

آآآه اتجوزها، دي مهمن كان من مصر، تملك هيبة في وسط
عيال الحة".

وأرجع تاني وأفكر وأقول:

"ستي فهمة حتضر بني، وأبويا حيقول يا خي خدك لاوّل نص
ابتدائية".

طيب.. أهرب بيها؟

طب على فين، وأنا بردك أعرف أروح على مصر؟

ده أنا عمري ما بصيت أعلى من المادنة بتاعة الجامع، عمري ما
هربت بعيني أبعد من خضرة تحوط على أي شعاع خارج منها.
يا عيني يا "مصر"، مش حقدر أساعدك، وكمان م الآخر مش حقدر
أبعد عن أبوكي، لازم أكسب، لازم ولا بد ألمس بإيديا العشرة.

شيطاني لعب في دماغي وقاللي:

(يا عبييط، هو انت مصدق نصباية عم فاروق، حتلاقي جرابه فيه
كل الأرقام إلا العشرة، وكمان حتلاقي كل الصناديق مليانة "تحلية
البق"، بما فيهم صندوق العشرة).

رحت في يوم بالليل على "مصر"، سارق رغيفين قشطة من الحلة
اللي في أوضة ستي.

وقلت : "يا مصر اتعشي".

فرحت موت، وقالت لي: "بحبك"،

قلتلها أنا نفسي أتفرج ع "العشرة"، نفسي أشوف الصندوق
المجنون إياه.

وقالتلي تعالى..

وسحبت إيدي لجوة الخيمة، وعطتني جراب الأرقام.

وقلّبت الأرقام عالارض، ولاقيت قدامي العشرة، وفرحت.

- يا شيطاني يا ابن الكلب، بتلعب في دماغي؟، عايزني أكره عم
فاروق؟.

آه، نسيت،

قلت لمصر:

"باقي نشوف الصندوق المجنون، نتفرج ع الجائزة الحلم".

ولاقيتني قدام اللوحة المليانة صناديق كرتون، وفتحت الصندوق
العشرة.

وكانت الكارثة، وببص ورايا وقدامي وألقى شيطاني ببضحك.

ولعنت فاروق، وشتمت البت، وجريت على دارنا، ورميت عيني
في حضن أمي، وحلفتها، عمري ما حروح المولد، مش حخرج
من دارنا لحد ما يخلص.

كل ما بفتكر الجائزة اللي ف صندوق العشرة، أعيط.
عم فاروق كان كاتب جوة الصندوق بحروف بهتانة
كلمة "مصر".

إِوعَى تَنَام ...

لِحَسَن تَصْحَى تَلَاقِي بِلْدَكُوا فُغْمَى عَلَيْهَا
وَبَابَتَ فِي وَسْطِ الطَّل.
وَتَلَاقِي الْبَيْتَ الَّذِي لَا مَلَّوَا
مُهَاجِر فِي النَّاحِيَةِ الثَّانِيَةِ مِنَ الدُّنْيَا.
النَّاحِيَةِ الَّذِي صَفَار الرَّمْلِ بَنَاعَهَا
يَسْتَلْخِلُ بِجَمَار الدَّم.

الحدوة الثالثة

فاكرين ؟....

لما ف يوم الشمس اتخاصمت ويا الدنيا، واتحايلت ع الضلمة تحل مكانها لحد ما تتعود ع الحيرة والتكشيرة اللي اترسمت في وشوش الخلق.

فاكرين ؟....

لما الضلمة بتستغرب منيها وتهديها وتفكرها بحب الناس للنور وبتعطس فبتعمل حاجه شبه البرق.
والناس حيرانة ما بين النور والضلمة وتبص لفوق وتداري بإيدها عنيتها لحسن يبجي النور على غفلة فيعميها ويخليها لا شايفة النور ولا عارفة الضلمة ولا قادرة تحدد فين الفرق.

فأكرين...؟

... أنا فأكر..

تقريباً يومها الضلمة قالت للشمس:

"أنا مالي، خدي دورك في عيون الناس لحسن حد يقول إن الضلمة ممكن تهزم نور الشمس".

يومها الناس ف بلدنا صحيت على صوت الراديو يقول:

"أنا كداب.. أولادكم ماتوا والأرض خدوها، والراجل اللي رسمتوا ملامحه الصعيدية ف عين الشمس طالع بيقول: أنا ماشى، والحق علياً، وموافق إني استحمل أي عتاب".

وبنسمع صوت المادنة بتاعة الجامع بتقول قرآن عن سيرة الشهدا وف نفس الثانية بنسمع صوت النسوان اللي الحزن ماليهم بتصوت من جوة بيوتها، والحزن ف صوتهم بينادي على عيالهم اللي خدوهم لجل ما يكسروا بيهم شوكة البعدا.

وف مندرة الدار، ستي فهيمة واقفه قصاد صورة سيدنا الرئيس بتعيط، بتقول له:

"ارجع يا جمال بلا لعب عيال، حتشمت فينا ولاد الكلب الكفار".
والبت جرادة بتطلع فوق السطح تبص يمين وشمال وبعيد يمكن تلمح أى يهودى.. وتنزل وتقول:
"الراديو ده أكبر كداب يا جماعه، الأرض مكانها، محدش قرب منيها، ولا حدش قرب م الدار".

والناس في بيوتها بتهرب من فكرة إن المادنة بتاعة الجامع
بتعزيهم، الناس مش عايزة تسمع قرآن.. القرآن يومها كان معناه
الحزن، معناه الموت؛ حتى لو كان يبشّر بالجنة.
الناس مش عايزة تروح الغيط.

لأ، الناس مش فاكدة الغيط، أصوات ياما بتخرج من زرايبهم زي
عياط البني آدمين، واللي بيعرف يتفاهم ويّا طيورهم وحميرهم
وعجولهم، يعرف إن الصوت الطالع منّيهم معناه جعائين.

وأنا واقف ف البلكونه ببص لفوق، مستغرب إن الشمس لحد
الضهرية مطلعتش، إن سحابة كبيرة بتمنع قرص النور عن كل
بلدنا.

والحاجة جليلة أم جلال تخرج من دارها تصوّت وتعيط وتخط
على باب الدار وتقول :

"ست فهيم، كلمي عب ناصر من تلافون العمدة، وقوليلوا إوعاك
تمشي من غير ما ترجّع لعيال،

قوليلوا أم جلال بعنتلك لتنين وقوليلوا أساميهن مرزوق وجلال".
وستي فهيمة بتدفن راسها ورأس الحاجة جليلة ف طرحتها السوداء
وبتقول وبصوت مبحوح:

"بس يا بت بلاش خوتة، عيالك راجعين والأرض حترجع والشمس
حتطلع وجمال لازم ولا بد حيرجع".

محمد بيه الراجح ييلف على بيوت الناس اللي عيالهم ع الجبهة،
وبيقول للناس:

"الرئيس راجع، الرئيس حيرجع كل عيالكو الأبطال".
والعمدة ف ديله يوزع ع العتبات فتة ولحمة وريالات عمّال على
بطل.

والأيام في بيوت الناس تتلكع مش عايزة تعدي زي القطر بتاع
المركز ما بيسبق بالعافية حمارة الكارو العيانة.

وشوية، والشمس بتستهبل وبتنسى وتطلع من تاني وتأخذ غفوتها
لحد الضلمة ما تصحى.

وستي فهيمة قافلة عليها باب الأوضة تصلي وتقرأ القرآن وتبص
ف صورة سيدنا الرئيس، واللي يكلمها تقول له:
"سيبوني.. مهمومة وزعلانة".

والحاجة جليلة كشفت راسها ونامت على عتبة سيدنا الراجح
حالفة ما ترجع بيتها إلا اما يرجع ليها عيالها التايهين ف بلاد
الرملة العرقانة.

ويومين والناس بتحاول تهرب م الضلمة بغيوبة النوم.
تطلع أصوات من عند المادنة بتاعة الجامع بتقول:
"الواد مرزوق ابن الحاجة جليلة راجع بيعيط موجوع".

وانا بجري على البلكونة ألقى خلق الله اتلمت حواليه، تستغرب
من منظر عسكري لابس لبس العسكر مقطوع.
والواد مرزوق هو كمان بيعيط وبيسأل كل الناس عن أمه،
والنسوان اللي عيالها من يوم الحرب مجاتش، تتشعبط في هدمه
يمكن ينطق ويقول:

"إبنك حي يا خالة، إبنك لسه مماتش".

والناس بتشاور للواد مرزوق على عتبة سيدنا الراجح وبتمشي
وراه زي المشيين ف جنازة من غير خشبة ميت.
والحاجة جليلة بتلمح وش الواد مرزوق بيعيط، غطت راسها
ومسحت من جوة عنيتها الدمعة البايطة.
وبصوت شبه اللي بيخرج من بق الرحالة العيانة بتصرخ وتقول:
"فين أخوك؟"

والواد باصص في الأرض وساكت ودموعه بتروي الخرس النابت
ف وشوش الناس حواليه.
والحاجة جليلة بظهر إيديها المرعوشة بتضرب وشه وتمسح حبة
مية بتخرج من جوه عنيه.
وبنفس الصوت الخارج من بير في الصحرا هربت منه المية
وحطت كل الرملة عليه، صرخت فيه:
"ارجع يا جبان مش عايزاك، ارجع لجمال وإوعاك أشوفك غير لما
تكون الرملة وجتة أخوك وياك".

والواد مرزوق يرجع من تاني باصص في الأرض وهريان من كل
النسوان اللي بتتشعبط ف هدموه المقطوعة، وتجهز صرخة لجل
ما تحضن بيها الموت يمكن ينطق كلمة:
"أيوه يا خالتي.. ابنك مات".

وأيام بتفوت وشهور بتموت ومحدث شاف مرزوق راجع حتى
يطل على أمه.
والحاجة جليلة من يومها قاعدة بفرشتها بتحرس عتبة سيدنا
الراجح.

وف يوم بعد الست سنين ما تعدي وقبل الناس ما تنام، بنشوف
اتنين لابسين زي العسكر رايعين ناحية سيدنا الراجح، شايلين
المخلة بتاعة مرزوق وييدفنوا كيس رمل ف حجر الحاجة جليلة
ويقولوا:

"ابنك مرزوق حملنا أمانة، وفاتلك ويانا...
حبة من رملة سينا".

إِوعَى تَنَام ...

لِحَسَن تَنَسَى الْفَرْقَ مَا بَيْنَ الدِّينِ وَالْدُنْيَا

مَا بَيْنَ الْمَادَنَةِ بِتَاعَةِ الْجَامِعِ

وَالْقَصْرِ الَّذِي يَبْلَمَعُ فِي الضُّحَى

الحدوة الرابعة

بيقولوا إن بلدنا ف يوم اترقت .
أكثر من نص القطن أسود وأكثر من نص القمح اتفحم .. أكثر من
كل الدنيا اتهد ، وأكثر من كل الرجالة خافت تخرج من دورها .
بيقولوا كمان البوستة ، النقطة ، كتاب الشيخ مسعود ، والوحدة
الصحية اترقوا .
إن العربيه الكارو المسحوبة بحمار واللي بتنقل بستلات المية
عشان تطفى الولعة كمان اترقت بحمارها .
بيقولوا إن الدنيا ليلتها اتردمت بالدخنة السودا اللي بتزكم مناخير
الناس بريحتها ... ريحة بكرة المتفحم والعمر المحروق .
بيقولوا مفيش دار في بلدنا ما طاليتهاش الولعة ، والناس جواها
يصلوا ويدعوا وعينهم قبل إيديهم ممدودة لفوق .

بيقولوا ليلتها الناس قالت للموت جاهزين.. مش فارقة معانا،
واللي يموت محروق حيخش الجنة.

بيقولوا:

وفجأة ترعة سيدنا البهلول بقت أكبر من بحر كبير بيفيض بالمية،
والمية بتمشي برجلين لمكان الولعة تطفيها.
بركة سيدنا البهلول حلت يا اخوانا والولعة بتخلص والمية بتنشف
جوه الترعة.. السما رجعت صافية، والناس بتنفض كل تراب
الرعب ف جوفها وبتخرج للشارع بتخط على باب النور الرباني،
والناس بتجمع بعضها تقعد حوالين الترعة المبروكة وتستغرب،
ده مفيش نقطة مية في قعر الترعة، ده مفيش غير لون الطوب
المتهب والخضرة المحروقة.

الناس حزنانة ومحتارة وباصّة لفوق، يمكن ربنا يفرجها، يمكن
يلقوا بلدهم رجعت خضرا وينسوا الرعب وترجع تاني الضحكة.

شيخ الجامع يزعم في الناس وينادي:

"المادنة بتاعة الجامع متحرقتش، المادنة سليمة".

وسيدنا زبالي يزعم ويقول:

"الناس الصالحين مقاماتهم عايشة، وعايشة معاها البركة".

والناس بتبص الناحية التانية وتهتف وتقول:

"قصر البيه الراجح لساه منور، بركة سيدنا الراجح حالة عليه،
ومستجرتش الولعة تهوب نواحيه".

في الآخر...

شيخ الجامع ماشي بيحضن بعنيه المادنة العالية بتاعة الجامع.

وسيدنا زبالي بيجري ناحية سيدنا البلشي وبيقول:

"شي الله يا حبيبي".

والناس سحبت بعضها ومشوا الناحية الثانية؛ قاصدين القبة

بتاعة البيه.

إِوعَى تَنَام ...

لِحَسَن تَصْحَى تَلَاقِي الدُّنْيَا مَشَى لِسَاهَا الدُّنْيَا

يَمْلِكُن تَلْقَاهَا بَتَجْرِي عَلَى سُرِيرِ الْإِنْعَاشِ..

مَسْتَنِيَّةً اطْوَتْ

الحدوتة الخامسة

عم زباللي حارس سيدي البلشي - واللي الناس كان بتحب تنادي عليه وتقول له يا سيدنا زباللي - كان بيصلي معانا الجمعة...
لأ مش عادى...

أول مره أشوف سيدنا زباللي يصلي ويّا الناس في الجامع.
راح أسمع واحد يسألني عن المانع... والرد بسيط.. منقول من خاشم ستي فهيمة:

"سيدنا زباللي بيصلى كل الأوقات مع سيدنا البلشي".
والشيخ محجوب شيخ الجامع أول ما بيلمح سيدنا زباللي قاعد وسط الناس راح حالف بمقام سيدنا البلشي ليخطب فينا الجمعة.
وعم زباللي بتزغرد ف عنيه الفرحة، أول مرة حيطلع ع "المنبر"،
أول مره حيعمل فيها إمام.

وزبالي كان عارف جداً إن الناس مش شايفاه زي شيوخ الجامع،
الناس كات حاسباه درويش من دراويش البلشي، وساعات بيقولوا
عليهم خدام.

سيدنا زبالي يقطع عتبات المنبر بالراحه، ويبص على الناس من فوق وعنيه بتعيط ويقول: "سيدي البلشي امبارح قاللي: قول للناس قيامتكم حنقوم يوم الجمعة!".

وزبالي سكت مخطبش الجمعة، وبينزل من ع المنبر بيعيط أكثر.
الناس بتبص شوية لبعضيها، وشوية تبص لشيخ الجامع مش
عايزة تصدق نفسها.

الناس بتبخلق في الشيخ مرعوبة، مستتية يقول:

"ده كلام مجنون".

مستتية يقوم يخطب خطبة جديدة، أو يضحك حبة نفس الضحكة
اللي بيضحكها لما بيتريق على ناس بتشكك فيه لما يلم فلوس
للجامع، أو لما يشوف واحد متخافق ويّا جماعته وجاي بمخدة ينام
جنب المنبر، وأما ينادى عليه يعمل رايح فى النوم مش سامع.

شيخ الجامع هو كمان كان بيعيط ومبلم، مش عايز يتكلم... وأما نطق قال للناس قولوا ورايا: "سلم سلم.. يارب سلم".

والناس مش عايزة تكرر ويا الشيخ.. الناس جريت بعنيها تدور على سيدنا زباللي ومش لاقياه.. الناس بتسيب الجامع وبتجري ناحية سيدنا البلشي، بتدور على سيدنا زباللي ومش لاقياه.. بتكلم سيدنا زباللي ومش لاقية اللي يرد عليها.

النسوان خرجت في الشارع بتعيط، وطيور السطح بتخرج وياهم بتقاضي، وحمير الناس وعجولهم ومعيّزهم بتكسر في بيبان زرايبهم وبتخرج في الشارع وياهم تراحمهم في وليمة الرعب النازلة عليهم من فوق.

وساعات والناس في بلاد الله الـ"حوالينا" بتعرف بالخبر الداير في بلدنا، والناس الغرب بتفرش في الأرض وتقعّد وتنام حوالين مقامات الصالحين.

أول مرة بلدنا ألقياها أزحم من سوق يوم الأربع، ومحدث عاد بيروح الأرض، ولا حدش عاد يتخاف أو حتى يهزر مع حد.

الناس بتصلي، الناس بتخلص جزأين قرآن في الساعة الواحدة. ومحمد بيه الراجح ساب القصر وراح على مصر، والعمدة لابس جلابية قديمة وفارش عمة راسه فوق الأرض وقاعد على باب الجامع بيوزع أكل على الناس، ويعيط.

والناس بتسييه وتدخل م الناحية الثانية ويتقول له :
" أكلك وفلوسك حيودونا معاك النار".

الناس بتعيط أكثر ما تصلى، والواحد منهم ماشي يكلم في اللي
يقابله، أيّا كان اللي يقابله، ويقول له : " سامحني"، ويرد أخينا
عليه ويقول له : "... وانت كمان".

والناس الكبرات في بلدنا بتزق ع " الشيخ محجوب" علشان ينزل
من فوق المادنة بتاعة الجامع.

حاكم الشيخ محجوب هو اللي معاه مفتاح الباب اللي يوديك
عالسلم اللي يخليك تطلع فوق.. قرب السما بشوية.

والشيخ محجوب نازل زي الناس بيعيط، وتقول له الكبرات :
" يا شيخ محجوب... قولتلنا زمان الدنيا مش حتقوم قيامتها من
غير علامات".

والشيخ محجوب ببزق فيهم ويقول : " روحوا اقرولكم حبة قرآن
أو صلوا وكفايه كلام، العلامات مش لازمن تيجي لحدينا، ربنا
خالق في الدنيا بلاد أكثر بكتير من حوارينا".

أجدع حاجة إن الشيخ مسعود قفل الكتّاب، والناس بصت لقيت كل
عيالها بتدفن تحت الأرض الأقلام وألواح التحفيظ وبتلعب في
خرابة سيدنا الراجح.

وأما بتسأل عيل منيهم: " طب ليه؟"... حيقولك:

"عشان نبقى نكمل حفظ القرآن في الجنة".

حاكم الشيخ محجوب بشر كل عيال الدنيا بدخول الجنة...
اللي يضحك إن الغفرا بتوع النقطة هما كمان عملوا زي عيال
الناس، حفروا لجل ما يدفنوا بنادقهم تحت خرابة سيدنا الراجح.

والأيام في عيون الناس على غير العادة بتجري، والناس في بلدنا
بتجري وراها عشان تلحقها، تخلبها تهدي شوية، تقفش في النور
لجل تكروهوا في الليل وتخليه ما يقربلوش، تمسك بسنانها وبأيديها
في جلايب الليل لجل ما يتحنط في مكانه ويتخانق ويا النور ولا
يعرفهوش.

الناس بتصلي الفجر يوماتي وتطلع تقعد حوالين الجامع مستنية
الشمس تططب على خد الدنيا من الناحية اللي يوماتي بتطلع
منها... الناحية اللي بتحضرها عندهم لما يصلوا، خافين الشمس
تكربج كل الدنيا على قفاها وتطلع م الجبهة اللي الناس في بلدنا
اتولدوا لقوا كل اللي يموت يسكن نواحيها.

ولاقينا يوماتي بلدنا بتتخانق ويا النور، ويوماتي بتتخانق ويا
الضلمة، ويوماتي بتتخانق ويا شيطانها اللي غواهم عمر بحاله
وخلاهم من غير تحويشة تططب كفة حسناتهم وتنجيها.

الدنيا بتنزف دم يوماتي لحد ما وصلت للنقطة اللي بتهتف بحياة
الموت وتطرطش بسواده ماضيها.

أهل بلدنا وأهل بلاد الدنيا الـ"حوالينا" واقفين حوالين الجامع
يستنوا الشيخ محجوب ينزل من فوق المادنة بتاعة الجامع لجل
يصلوا الفجر بتاع ليلة الجمعة الموعودة... آخر فجر يصلوه
وتشوفه الدنيا، آخر ركعة وآخر سجدة وآخر قرآن يقرؤه.
والناس اتفقت حيخلوا الشيخ محجوب يقرأ القرآن في الركعة
التانية ويدعي لحد قيامة الدنيا ما تطلع وتقوم.
والشيخ محجوب نازل من فوق من كتر المية اللي بتخرج من جوة
عيونه وتغرق دقته وكل هدومه.. الناس قالت يمكن محموم.
والشيخ محجوب بيرص الناس جوة الجامع ويبص ف ملامحهم
على قد ما يقدر... والناس هما كمان واقفين يتلفتوا حوالهم يمكن
واحد منيهم يلح آخر صورة خدتها عيون الدنيا لأبوه أو ابنه أو
أخوه، لجل يخزنها ف عينه..
وتلاقي الواحد منيهم بينط بودنه برة الجامع يمكن يلح بيها آخر
صوت للدعة اللي بتصرخ على وش النسوان الـ"من دمه".
الناس حاسة وهي بترفع إيدها تكبر إنها بتشاور للدنيا تودعها،
وبعد ما ترفع إيدها ترجع تاني تنزلها وترجع ترفعها وترجع تاني
تنزلها.
الناس عارفة وفاهمة إن اللحظة اللي حتبدأ فيها تصلي حتبقى بداية
آخر نبتة دنيا حترويها دموعهم.
حتبقى اللحظة اللي وراها يا إمّا الجنة يا إمّا النار.

الناس خائفة...

ده الناس لما الدنيا تمطر في الشارع مع حبة رعد وبرق تلاقيهم خافين يخرجوا من جوة الدار.

الناس افكرت فجأة إن محدش نام ولا داق النوم من يوم الجمعة الفايئة.. الناس بتحسس نفسها بدوخة وتقع وتنام في مكانها. والشيخ محجوب بعد ما خلص سورة الفاتحة وبيأمن، مبيسمعش الناس بترد وراه، وكمان مبقاش سامع صوت التوبة الخارج من جوة دموعهم.

الشيخ محجوب ببص وراه بيلقي كل الناس في الجامع قفلت كل عيونها ونامت، والشيخ محجوب راح ماسح كل دموعه وقاعد عالارض ومن غير ما يحس ولا يقرر راح نايم.

وبلدا بقت زي قرافة كبيرة.

لحد الصبح ما راح طالع ع "الدنيا" زي الصبح بتاع امبارح. والشمس بتدخل على ناسها من الباب الرباتي العادي.

والناس نايمة...

لأ...

مش عارف إن كانت نايمة وللا مش عايزة تقوم.

يمكن كانوا خافين من تفتيحة العين لتقابل حاجة غير الدنيا.

وشوية وكل عيال الدنيا راحت قايمة بتضحك.

وشوية وجريت تلعب زي عاداتها جنب خرابة سيدنا الراجح.

وشوية وجمّعوا نفسهم لجل يصحوا الناس النايمة جوة الجامع والنسوان النايمين حواليه، وبلدنا بتصحى قرب أدان الظهر وهي بتضحك.

كل الناس في بلدنا قامت من رقدتها بتضحك وبتضرب كف بكف بتسأل وبصوت عالي :

"فين سيدنا زباللي ابن الكلب الفركوك".

كل الناس في بلدنا كانت فرحانة بتضحك، إلا عيالهم مناكيد.

جمعوا نفسهم من تاني والواحد فيهم بيقول للتاني:

"يعني حنرجع من تاني نصحى يوماتي قرب أدان الفجر نروح كتاب الشيخ مسعود؟".

والتاني يرد عليه ويقول:

"أنا قلّمي ولوح التحفيظ حطتهم تحت الأرض وضاعوا".

كل عيال الناس في بلدنا اتفقوا يقولوا:

"اقلامهم والواح التحفيظ بلعتها الأرض وضاعت.. يمكن راحت سبقتهم ع الجنة".

والناس في بلدنا بتتخانق في الراححة وفي الجاية.

واحدة بتتخانق مع تانية عشان الفرخة الذهبي.. والتاني بيتخانق مع جاره وبيزعق ويقول: "والله ده حماري".

وبلدنا شوية ولقيت نفسيها في عركة كبيرة، ومحدث شاف ثاني
الشيخ محجوب، ومحدث شاف من ثاني سيدنا زباللي.
وشوية وصوت بيزعق في الناس ويقول :
" الغفرا بتوع النقطة لساهم نايمين حوالين المادنة بتاعة الجامع".
والناس بتروح نواحيهم ضاحكين لجل يصحوهم، والغفرا يفتحوا
في عنّيهم فيلاقوا الدنيا لساها الدنيا.
والغفرا تفر فر من بين الناس وتجري بتحفر في الأرض.
الغفرا بتخرج من تحت الأرض بنادق شبه النابيت، وبيطلع ويّا
الردم بتاع الحفر أقلام وألواح تحفيظ...
من يومها وكل عيال الناس في بلدنا بتكره غفرا النقطة.

إِوعَى تَنَام ...

لِحَسَن تَصَحَّى تَلَاقِي حَبِيبَكَ مَشَى جَنْبَكَ

وَسَاعَتَهَا حَتَّعَرَفَ إِنَّ أَطْوَلَ بَيْنَقِي

الحدوة السادسة

في بلدنا اتنين مجانيين .

- آسف، واحد مجنون والثاني عبيط -

المجنون كان اسمه "زغابي".

الناس بتقول إن زغابي ده مش اسمه، الواد حط علينا وهو صغير

من حته اسمها "كوم السكر".

كوم السكر كانت زغابية، وبلدنا كانت أكثر من نصها هلالية،

تقريباً لقيوا الواد مجنون فانتهزوا الفرصة وشتموا زعيم السيرة

الزغابية وسموا المجنون بـ "زغابي".

القصـد...

في يوم الصبح، المادنة بتاعة الجامع كانت بتصحي الناس علشان
الفجر، وزغابي داير في الشارع بيخبط ع الابواب ويزعق وينادي:
"اصحوا يا مجانين، النوم فات.."

اصحوا يا مجانين، الرئيس مات."

وستي فهيمة تبص من البلكونة وتزعق فيه وتقول:

"ريس مين يا بن المجنونة؟"

وزغابي يرد عليها:

"الرئيس مات يا فهيمة."

زغابي أول واحد أشوفه ينادي عليها فهيمة كده من غير كلمة
ست.

ستي فهيمة بتعيط وتصحى الدار، وتبص في عيني أنا بالذات
وتقوللي:

"زغابي بيقول الرئيس مات."

وأفرك في عماصي وأرد عليها:

"ريس مين ع الصبح، زغابي ده مجنون."

والبت جرادة قال خايقة علياً وبتزعق فيا:

"اسكت يا مقامه ليأذك على طول، ده بيخدم سيدنا البنهاوي،
والود ما بينهم دائماً موصول."

وستي فهيمة بتبكي، لساها بتبكي، والبت جرادة تعيط هي كمان
وتقول: "كان راجل طيب، كان غلبان."

وانا برفع بُلغة جدي وبحدفها في راسها وبشخط فيها في نفس اللحظة: "وده مين ده يا جربان يا بنت الجربان؟".

وجردة تولول أكثر وتقول:

"ودي عايزة نصاحه، الرئيس صبحي بتاع الفول".

والريس صبحي يا حضرات أصلاً ميت من أكثر من سنتين.. يمكن من قبل ما يردموا ترعة سيدي البهلول.

وستي فهمية بدأت تتكلم ويا الأسياد.

مقدرتش أمسك نفسي من نوبة ضحك بتلبسني في المعتاد لما البت جردة وستي فهمية بينصبوا معزى جوة الدار من غير أسباب، وييدهنوا كل حيطانها سواد، وأي حمار من أهل الدار مطلوب منه غصين عنه يقلبها حداد... مرة عشان سيدي البلشي زار ستي فهمية ف فرشتها وكان زعلان.. أو عشان المعزة البني اللي عنيتها بتشبه عين ستي مش عايزة تعشر وبتتنطط زي اللي ماسسها الجان.. ومرة عشان تاهمين أُمي إنها عاملة حجاب للبت جردة بوقف الحال.. أو عشان البيه الراجح عيان.. أو محمود بن الحاج علي العطار مسكوه في النقطة وحاسس إنه بيتهان.

ومفيش مرة حسيتهم زعلوا على واحد مات.

بس المرة دي... بتعدي ساعات، وينسمع نسوان في الشارع بتصوت، وشوية يبجروا ويقولوا وبصوت بيعيط: "الريس مات، الرئيس مات".

والراديون اللي بيقرا القرآن م الصبح ببطل لجل ما نسمع فيه صوت بيقول "الريس مات".

من إمتى يا خلق زغابي بيطلع في الراديون؟!.

ومحدث جري ع البلكونة، ومحدث حرك عينه من مكنها، كلنا بنبص لحاجة مش شايفينها، كلنا بنحاول نقنع نفسينا زي البت جرادة إن الريس صبحي ممتش، وإن الناس في الشارع تقصده هو، وإن زغابي احتل الراديو ببركة سيدنا البنهاوي وقاعد فيه من جوة.

كلنا خافين الدمعة من عينا تفر لحسن بعينا نشوفها فنصدق إننا عشنا لحد اليوم اللي يبكيها الحزن عليه.

ستي فهيمة مبتعيطش، أمي بتدفن كل دموعها ف عين أبويا، وأنا زي الشارب بوظة وسكران، خايف ليفوق فيلاقى زغابي مطلعوا لسانه وشالح جلابيته وبيقول له:
"أنا مش مجنون.. الريس مات".

والبت جرادة بتضرب صدرها بإيديها وعماله تقول :

"هو الريس يا ولاد بيموت؟!".

ونفوق على هبة ستي فهيمة بتلبس جلابيتها السوداء، وبتلفح طرحتها عليها، وبتخرج حافية تلف عليهم واحد واحد.
بدأت بالبلشي وبو طاقة والبنهاوي وبخوري، وختمت بالمادنة بتاعة الجامع.

الناس في بلدنا طول عمرها مقسومة نصين: نص زغابي، وأكثر من النص هلالي.

المرّة دي بلدنا اتقسمت نصين...

نص بيمشي ويا زغابي، والنص الثاني بيجري ورا ستي فهيمة. ستي فهيمة لمت حواليتها كل الجلايب السودا، ولفت وياهم على مقامات كل الصالحين.. طلعت فوق المادنة العاليه بتاعة الجامع، وقفت فوق المنبر، مسكت في السماعة وبعزم ما فيها بتدعي: "يارب.. طب خد كرماني وسيبه يارب".

وسيدي كرماني بيسمعها، يلطم على خده ويتنطط ويزعق:

"منك الله يا فهيمة، جرسيتيني في وسط الخلق".

وزغابي لامم حواليه رجالة كتير ببشيلوا نعش كبير باين من جواه صورة ف جسم الرئيس.

والجلايب السودا رجعت لبيوتها تعيط وتصلي، والرجالة فرشوا الحصر على العتبات، الواحد يهمس في ودان الثاني بحسرة عمره: "عبد الناصر مات".

والبت جرادة ف دارنا عمالة تولول وتقول:

"والله الراجل كان زي البفته البيضاء، محبوب م الناس وكويس".

وأنا قبل ما امسي لسانها ببلغة جدي، قلت أسألها سؤال:

"تفتكري... مين يا جرادة ممكن يجيبوه يعمل ريس؟".

سكتت حبة... وقال إيه بتفكر، وتقول:
"عبّاسط، الشيخ عبّاسط طبعًا، وده برضه سؤال، هما يلاقوا زيه."
من يومها بعلم في جرادة سياسة ووطنية..
ويوماتي بعد ما تتوسطن مندرة الدار في الفجرية تزعق وتقول:
"تحيا الجمهورية العربية".

إوعى تنام ...

لحسن نصحى تلاقى اطوت يطلع فى لسانه

ويقولك ..

اعرفني , بس اوعاك تحبيني

الحدوة السابعة

طول عمري وأنا عايش وسط الناس اللي في بيتنا بشوف الموت
من حنة بعيدة.

يمكن من بلكونة دارنا وانا بسمع صوت النسوان لما تصوّت ورا
نعش الميت... وساعات من سيرة الصالحين اللي لبانة في بق
البت جرادة وستي فهيمة... ويمكن من كتب الحواديت فوق سطح
الدار قبل الديك الرومي والمعزة البني ما يهرسوا كل الناس اللي
بتتكلم وتعيش وتموت جواها.

طول عمري بخاف م الموت، بالذات لما أُمي بتتنرفز وبتتعصب
على كل الدنيا وتدعي تقول :
"خذني يارب وريحني".

وببص ف نفس الثانية لفوق، عند اللنضة المتعلقة في السقف،
وبصوت خارج من نن عنيا بقول :

"لأ، ومقام سيدنا البلشي يارب ما ييجي اليوم وتريحها".

طول عمري بشوف إن الموت حدوتة.. يحكوها لما العيل يغلط
ويهزر ويّا الدنيا ويفضحها.
لحد في يوم..

المعزة اللي عنيا بتشبه عين ستي فهيمة سهّتنا وعملتها وماتت.
ماتت من غير ما تخلف عيلة تفكر كل الناس بالعين اللي بترعب
أجدع شنبات في بلدنا.

البت جرادة هي اللي اكتشفت موت المعزة، نزلت من فوق السطح
تعيط، وبصوت واطي تميل على سيدي كرمانى تقول له :
"الست فهيمة المعزه تعيش إنتا يا سيدي".

وسيدي كرمانى بيقفل بقها بايديه لتنين ويقرر إن محدش لازم
يعرف بالكارثة لحد ما يتصرف. وأما لمحني قريب منهم حاطط
وشي ف حلة محشي وبستهيل، إتأكد إنى سمعت كلامهم راح قايل:
"إوعاك يا مقامه تقول لامك أو أبوك أو حتى الست فهيمة لحسن
تحصل محزنة في الدار ومحدش ناقص"

وانا زي العادة بهز في راسي، قال يعني موافق، وبقول له :
"خلاص.. ولا حد حيعرف خالص".

وبنسمع زفة مولد سيدنا بخوري بتلف الشارع، والزفة زمان كانت
بتضحكني، بتخليني أفطس على روعي من كتر الضحك.
كنت بشوف ناس عمالة بترقص وتطبل راكبين حناطير وخيول
وحمير وجمال، وتزرق وتقرّب من عتبات الناس وتقول :
" الفاتحة للحاج فلان، الفاتحة للست فلانة ربنا يرحمها".
واصحاب العتبة بيفرحوا موت ويبيعتوا للناس اللي بترقص وتقول
أسماء أمواتهم شلنات وبراييز.

كنت أضحك لما ألمحهم جايين عيل من سني ولايس أبيض ف
أبيض، فوق راسه عمة طويلة خضرا وشال، ويقولوا ده بركة وم
السلسال، وتبص ف وش الواد تلاقيه قرفان مرعوب بيزعق
ويقول: "مش عايز".

واما كبرت شوية كنت بخاف م الزفة بتاعة المولد، كنت بخاف من
أعلام في إيدين الناس مرسوم فيها حروف ونقوش مش مفهومة،
ولا زي اللي اترسمت في الكرايس.
كنت بخاف من لبس غريب بيفكرني بصورة العفاريت والجن اللي
بترسمها الحواديت بالليل تحت لحافي.

..القصد..

قلت لسيدي كرماني وانا بضحك : " هات قرشين أنزل ع الزفة
واخليهم يقرأوا الفاتحة لستي فهيمة المعزة".

وقبل ما تتمد إيديه على وشي؛ بيكتفها الصوت الطالع من أوضة
ستي فهمية يقول:

"خد يا مقامه... تعالى عايزاك".

وبجري عليها أهدد سيدي وأقول له:

"هات القرشين لحسن والنعمة أقول"..

وبخدم منه وبدخل على ستي فهمية ألقياها مائة إيديها بربع
جنيه صحيح، وتقول لي:

"روح للشيخ درديري خادم سيدنا بخوري، اديله الربع جنيه وقول
له : اقرأ الفاتحة لستي فهمية"..

يا خرابي، ربع جنيه بحاله، هو حيقرا المصحف كله؟!..
وأنا مالي..

وجريت على حسني بتاع التموين، خلبيته يفك الربع جنيه شلنات..
ورجعت أشاور للزفة...

يلمحني الشيخ درديري ويمد إديه ويسألني:

"إيه يا مقامه.. عايز ندعي نقول إيه؟!.."

وبرد عليه وأنا مادد إيدي بشلنين:

"ستي فهمية قالتلي أقولك، اقرالها الفاتحة... مش مرة... اتنين..
وبيستغرب ويقول:

"وده برضه كلام يا مقامه؟ بتقول على ستك ليه، ربنا يا بني يديها
الصحه وطولة العمر".

ويرد عليه:

"عندك حق يا شيخ والله..."

وبرجع إيدي في جيبى من غير ما اديلو فلوس، والشيخ درديري
بيقفش فيها زي العفريت في الحدوتة ما يقفش في الدنيا لما بيخرج
من جوة فانوس.

ويرد علياً وهو بيضحك بالكذب وضارب بوز:

"لأ يا مقامه يا ابني ما هي برضه الفاتحة ع الحي تجوز".

وبيرفع صوته ناحية عتبة دارنا ويدعي:

"الفاتحة لست الستات، الست فهيمة، ربنا يديها الصحة وطولة
العمر".

وف نفس الثانية بيطلع صوت من جوة الدار، البت جرادة بترقع
بالصوت الحياني، والناس بتسيب الزفة، وعلى عتبة بيتنا بتتلم.
معرفتش أخش الدار م الزحمة، لفيت...، نطيت من شباك الدار
الوراني، ولاقيت الناس على عتبة أوضة ستي فهيمة بتتشحتف
وتعيط وتصوت.

والبت جرادة وأبويا وجدي واقفين على راسها بيقروا القرآن،
جدي بيلمحني في وسط النسوان وينادي علياً:

"تعالى يا مقامه سلم على ستك قبل ما تتغسل وتسيينا".

ولاقيتها مغطية دماغها ومش شايفاني.

قلت له: "خليها تشوفني يا سيدي".

ورد وقال:

"شايفاك.. كلمها، قل لها في الجنة يا ستي إن شاء الله".
مش عارف ليه معرفتش أعيط... كان متهياي إن أكيد فيه حل،
إن أبويا حيضك بعد شوية ويحضن فيا يقول:
"كنا بنضحك وياك يا عبيط".

أو أمي حترجع م السوق بعد شوية وتزرق فيا:
"يا حمار ستك نايمة... شوية وحتقوم".
كان متهياي إني حفض عيني وأفتحها ألاقي الزحمة وكل عياط
النسوان علشان المعزة..

عمري ما شفت بعيني جتة بني آدم ميت، على طول كنت بشوف
الموت في الصوت الطالع من بق النسوان.
المرة دي، فتحت عنيا وركزت شوية لاقيت بيني وبين فرشة ستي
سور كله قزاز ف قزاز..

لأ.. م الجنب بتاعي قزاز مرشوش بالمية، والجنب التاني قزاز
مش شاي ف غير حبة ضلمة.

مسحت بإيدي عنيا لاقيتني بعيط.. ولمحت ف وسط الزحمة الشيخ
درديري بتاع الزفة رافع ف إيديه جنب عنيه وبیدعي، رحت
مفضي جيوبي وناولته بقية الربع جنيه وقرشين سيدي وقلت:
"ومقام سيدنا بخوري يا شيخ، اقرا الفاتحة لستي فهيمة".

والشيخ درديري بيرفض ياخذ مني فلوس .. رجّع إيدي وقال لي:
"إمسك مصحف واقعد على راسها، اقرا القرآن وادعيها".
ومسكت ف جلابية سيدي، مش عارف كنت ساعتها بيعط ولا
بصوّت ولا مبلم، وقلت لـ سيدي:
"عايز أشوفها، وغلاوة ستي نعيمة المايصة يا سيدي لشوفها".
وقبل ما اخلص اسم نعيمة؛ كان سيدي بيكتم بقي بإيد والايدي الثانية
تشيل الغطا من على ستي.
ولاقيتها عندها مقفولة، مش نفس القفلة بتاعة النوم العادي، فيه
حاجة كبيرة بتخرج من بين شفايفها بتتكلم مع لنضة سقف
الأوضة.. فيه حاجة مكتفة دراعاتها وبتزغزغ شفايفها.. فيه صوت
مكتوم خارج مع طيف الضحكة المرسومة في ملامحها.
الصوت لأول مرة ف عمر الدنيا يزعق فيّا بصوت واطي يقول لي:
"احكينا".
ولأول مرة ف عمر الدنيا بيعط من كتر الحب.
وبنسمع فجأة صويت طازة لساه خارج من كرتونة الحزن المتجدد
والصوت كان ناطط من فوق السطح..
وبنجري نلاقي أمي رجعت م السوق، قاعدة تصرخ وتصوّت وتعيط
قدام جتة ستي فهيمة المعزة!.

إِوعَى تَنَام ...

لِحَسَن تَصَحَّى تَلَا فِي الْكِرْبَا ج لَوْنَه اَتَغَيَّر

فَتَفَكَّر ثَانِيَةً إِنَّ الْكِرْبَا ج مِبْعَاشِ كِرْبَا ج

الحدوة التاسعة

معلومة مهمة جداً...

محمد بيه الراجح يبيع القصر، وفداين الأرض.

معلومة أهم...

محمد بيه الراجح ناوي يهاجر لبلاد برة وحسيب العضوية للعرض

معلومه تغم...

بييه ثاني - بيقولوا اسمه محروس بيه - راح يشتري منه الطين
والقصر.

معلومه تشل...

محروس بيه راح يشتري منه العضوية ويصبح نايب عنينا بجمالة
القهر.

التفاصيل :

محمد بيه الراجح بيلف برجليه، آه والنعمة برجليه؛ على عتبات
دورنا، عتبة عتبة.

بيسلم على كل الناس... المبسوط فيهم والمحتاس.

والناس في الشارع بتبوس في إيديه وتعاتبه :

"حتسينا يا سعادة البيه".

والبيه يضحك ويرد عليهم:

"رايح لولادي في بلاد برة أموت وسطهم".

والناس بتعيط وتقول له:

"طب والراجح يا جناب البيه".

والبيه يضحك أكثر ويرد عليهم:

"بركاته معاكم حتحل عليكم، الله يخليكم ليّا ويخليه ليكم".

بيني وبينكم الناس في بلدنا كانت فرحانة.

بيني وبينكم قلت بلاها سلامي عليه، والله ما انا واقف على عتبة

دارنا، والله لا انا قافل بابي وبلكونتي وحالف على بنتي ومراتي

والبت جرادة؛ محدش حيخطي العتبة، ولا حد حيتفرج ع الزفة

الدائرة في كل مكان... وجرادة تعيط.

وجرادة زي ما حضراتكم عارفين غاليه عليّا، كفاية إنها من ريحة

ستي وأمي وأبويا وهديتهم ليّا.

قُلتها : " اخرجي يا جرادة اتباركي بسيدنا البيه ".
أصل الناس في بلدنا غلبة بيتباركوا بالمجانين وأصحاب العمّة
وأصحاب المال؛ حتى لو كانوا من غير ذمة.

وتلف الأيام وبلدنا غريبة، زي المية الحلوة لما تسافر وقت
الفيضان للغربة في وسط المالح، بتحس بوحشة غريبة، بتحس
إنها محتاجة تموت لجل ما تتخلص من ذل الأسر المر.

بتلف الأيام وبلدنا مش لاقية كبير يتربع على عرش استعباد الخلق
الغلبانة، والناس ماشية في وسط الشارع حاسة انها ملكت دوار
العُموديه واستغنت عن كل جحور العبودية.

بتلف أيام وبلدنا بتهمس عن محروس حيحل محل الراجح، يقولوا
الراجح باع له مقام جده وحتى خرابته الواسعة.

أيام والناس في بلدنا بتصحى تلاقي مقامه اتساوى بالأرض،
والسور العيان اتهد وأوناش ياما بتنزح كل زبالة التل.
المنظر من بلكونة دارنا اتغير، المنظر بقى زي الفل.

شهور وشهور والمنظر بقى قصر كبير يحرم بلكونة دارنا تشوف
المادنة بتاعة الجامع.

فكرني المنظر بالموت.

وعرفت إن الموت مش بس ملامح ستي فهيمة وهي بتتخاقق ويا
الضلمة، ولا بس البت جرادة وهي بترقع بالصوت.

وعرفت إن الموت بيلون وشه بألوان الفرقة، والفرقة ألوانها كثيرة، أكثر من كل وشوش الفرحة لما بيتلاقى اثنين من بعد الغربة.

الناس اتشائمت من هد مقام الجد، الناس كرهت سيرة الراجح، والنسوان بتقول : "لعنة ربنا حتكون الرد".
والبت جرادة لبست خلخال الحكمة وهتفت وسط الدار:
"دي علامة من علامات العار، والساكت حيروح النار".

الناس مستنية البيه محروس، الناس زهقت من تمثيل أدوار الكبرا.. الناس محتاجة من تاني تطاطى وتحني الروس.. الناس في بلدنا محتاجة لإيد تسعد أنفاسهم باليوس، ولرجل بتلبس لميع على أحلامهم تهرس وتدوس.

الناس صحيت من نومها في يوم جمعة لقيت زفة كبيرة بتذيع البشرى، البيه محروس حيلف برجليه على عتباتنا، عتبة عتبة، حيسلم على كل الناس؛ المبسوط فيهم والمحتاس.

بعد صلاة الجمعة بساعتين، الناس اترصت قدام العتبات، وعيونها بتستنى اللحظة اللي تهلل فيها بروية راجل مش عارفينه جاي منين... مش عارفين إذا كان له حدانا مقام يرعاه وتحل علينا البركة معاه، ولا البيه جاي لينا من مصر، جاي يهزر، يشتري قصر ويبني في قصر.

من ثاني..

قلت بلاها سلامي عليه، والله ما انا واقف على عتبة دارنا، والله
لانا قافل بابي وبلكونتي وحالف على بنتي ومراتي محدش حيخطي
العتبة، ولا حد حيثفرج ع الزفة الدائرة في كل مكان.

وجرادة تعيط.. والمرة دي جرادة مش عايزة تشوف البية، بتقول:
"ستي فهيمة الله يرحمها ويجعل مثواها الجنة كانت بتحب البية
الراجح، كانت بتحب مقام بوطاقيّة، كانت بتحب تأدن ويّا الصوت
الطالع م المادنة بتاعة الجامع في الفجرية".

م الآخر... البت جرادة كرهت محروس بيه من غير ما تشوفه
وبتتحسر على أيام الراجح؛ مع إنها عاتبة عليه إنه يفرط في مقام
جده ويهد كيان البركة اللي كنوز الدنيا بحالها مبتقدرش تنوله.

أصوات من برة الباب بتزعق وتنادي:

"يا مقامه أفندي... يا مقامه أفندي...."

محروس بيه عارفك... محروس بيه جايلك مخصوص "

والبت جرادة بتفرح ويتمسح دمعته وبتقول:

"ربك جابر يا مقامه، يقطع وبيوصل بميزان مدروس."

والهبلّة بتجري ناحية صوت الباب الزاقي وبتفتح مع زغرودة

قوية تقطعها بقولها: "اتفضل سيدي البية، اتفضل يا جنابه".

آه يا بنت الكلب يا قلابة، في ثانية الدمعة اتقلبت زغرودة؟.. في

ثانية نسيتي الراجح والبركة وستي فهيمة وكل بداية الحدوتة؟.

ووقفت أسلم ع البيه الزاير، واستغربت كثير إنه بيحضني وعارف
اسمي وبيعزمني في قصره الطاير.

وحاولت أزوغ منه وأتأسف له وأتجج بالضغط الفاير.
ولاقيته بيرفع صوته في وسط الناس الماشيين وياه في الزفة
وبيقول: "يا مقامه أفندي، حستناك، مش حقل أعذار، عيبيب، ده
القصر يا راجل قدام الدار".

وبيمشي البيه ناحية قصره في وسط الناس، وأنا بلمح أغرب
حاجة في كل الموضوع... "البيه محروس، بيعرج ويزك برجليه".
والبت جرادة بتاخذ بالها وتغلز من ثاني ف عناقيد الحكمة
وبتحضن وزه وبتقول:

"يا خرابي... مكسح، يا عين أمك يا سعادة البيه، صحيح يا ولاد
الدنيا ميزان متعلق في السما بخيوط، الدمع في كفة والضحكة في
كفة والبني آدم بينهم مربوط".

وحياة أمك يا حكيمة، وده وقته، دلوقتي تقولي أنا كنت بكلم ستي
فهيمة، دلوقتي تقولي روحها حلت في الوزه وكانت بترد عليكي.
إلهي تولعي وأخلص من قرفك وأفرح فيكي.

بعديها بيوم بصيت ولاقيت اتنين شبه البهوات جايبين ياخدوني
لمحروس بيه.. بيني وبينكم الفار في ثواني خد كاس العالم في
وداني وقاعد بيقرقض فيها.. بيني وبينكم منطقتش ومشيت وياهم

خطوة وتانية ولاقيتني جوة القصر معاهم، ولاقيت البيه مستني
وصولي على باب القصر اللي يرد الروح.

أول ما لاقيته قدامي قلت: "يا بيه تعرفني منين؟"
رد علياً وقال:

"جرى إيه يا مقامه، مخك فين، ارجع بالعمر شوية، ارجع
عشرين... ثلاثين..

غفرا النقطة وبنادقهم، وكلاب الشارع تهرب منيهم ناحية كوم التل،
والناس الفتانة، والكلبة اللي اختارت عتية داركم علشان تتخانق
ويّا الفجر، ارجع يا مقامه لعيل كان بيمسي يوماتي عليك بالضحكة،
عيل شفته من فوق بلكونة داركوا هربان من غفرا النقطة الـ
"مالهم قلب"، هربان من نابايت عميانة بتساوي بينه وبين الكلب".

وقطعت كلامه وحضنت إيديه وصرخت في وشه:

"فارس.. الواد الشايل رجليه في إيديه".

رد علياً بسرعه وقال: "محروس... بيه".

وضحكت.. ودخلت معاه القصر.

معلومة أخيرة....

كل حيطان القصر متغطية بتساوير حقيقية بالطول والعرض،
لكلاب جربانة بتجري وسط زبالة التل، م السقف لحد الأرض!.

إِوعَى تَنَام ...

لِحَسَن تَصْحَى تَلَا فِي لِسَانِكَ حَاجِبَ صَوْتِ الضَّلَمَةِ

وَيَبِشْتَمُ نَوْرَ الشَّمْسِ فِي عِزِّ الْحَلَمِ ..

يَمَكِّنُ تَصْحَى تَلَا فِي لِسَانِكَ عَاجِزَ بِنَاطِقِ كَلِمَةٍ (لَا)

الحدوتة العاشرة

الناس في بلدنا لما بتتخافق عمرها ما تروح ع النقطة، لحسن
تبقى العيبة كبيرة في حق الباشا النايب والبيه العمدة.
الناس في بلدنا لما تحب تموت حد تستأذن لأول م البيه النايب
ومن العمدة.

لما بتسرق حد بتقسم على طول وياهم.
لما تحب أذية حد بتطلب ده بكل صراحة من مقامات الصالحين،
وف آخر الدعوة بتقرا الفاتحة و"يس".

الناس في بلدنا كانت لما تعدي بأي ركوبة من قدام قصر البيه أو
دوار العمدة تنزل من فوقها وتجري وراها وهي بتزغر لها بالبصة
المكتومة وتقول:

"شبيبيبيبييه، متبصيش حواليكى، يلعن صاحبك".

الناس كانت بتخاف، الناس أصلاً كانت عايزة تخاف.
الخوف عنديهم كان زي الطين الورث اللي يحافظوا عليه بالدم
حتى لو صابه العقم وتجريف الخير.
البيه النايب عمره ما كان بيزعل حد بنفسه وعمره ما كان حدًا
يزعل منيه عُقرًا توزع على أحلام الناس الموت وتلبسهم عمم
النوم الطوالى.
بس العمدة كان بينفذ كل أوامره.
وعشان كده كنت تلاقى الناس؛ كل الناس؛ تكره سيرة العمدة
وتحب البيه النايب وبتدعيلوا، والأغرب إن الدنيا لما تضيق في
عيونهم طوالى بيجروا ناحية قصر البيه.
والبيه النايب راجل طيب، دايماً يسمع شكوايهم، ودايمًا يلعن في
جدود العمدة قدام منيهم ويبيوعدهم إنه بنفسه حيثدخل.
بأمانة البيه كان دايماً طيب.
مرة يطلع من حبس الغفرا راجل مسجون بالظلم.
ومرة يجوز بالعافيه الشيخ مخيون - شيخ الغفرا - لعيلة غلبانة
بتسرح ببخور في المولد، لما الناس في بلدنا هاجت واتلمت
حوالين البيه بتبوس في إيديه وتقول له: "إلا الأعراض يا جنباه".
ومره يرجع للواد محفوظ ابن نوارس النص قيراط الورث، الـ
كان "هربان منيه، ولاقوه متخفي في دُرّة أرض العمدة.

بس الناس كانت دايمًا تسأل نفسيها: طب ليه البيه مبيطردهش
العمده وشيخ غفره، ليه مايخلصش الناس من ظلمه وشره.
البيه أغنى كثير م العمده، البيه واصل عند الكبرات اللي ف مصر
اللي الناس بتشوفهم في الراديو..

طب ليه مبيطردهش العمده؟ طب حتى الغفرا؟
لحد اليوم اللي الناس في بلدنا زهقت من كتر الـ"ليه...."
كل اللي اتهان وانداس بالصرمة اتجمع.. كل اللي اتهلب واتقيد
بالظلم.

أجيال طلعت للدنيا مفطومة بصرخة جوع أو ذل، ناس ليهم ناس
ماتوا من الحسره ومن لون الدم..
الكل اتجمع، الكل مقرر، الكل مسلح نفسه لحرب الشوم ومناجل
حش البرسيم.

حتى النسوان، والشيخ مسعود وزباللى وشيخ الجامع، ده حتى
زغابى مشلح جلابيته بيهتف في الثوار:
"طراير طراير... طراير يا ناس طراير".

واللمة بتاعة الناس كانت عاملة زي الزفة بتاعة المولد، مليانة
أعلام ودفوف وحمير وجمال ومناظر ناس دقنها متدروش من تقل
الحمل وطولة الصبر.

الزفة بتتجمع حوالين القصر بتاع البيه، رافعين الشيخ مسعود
فوق روسهم، والشيخ مسعود بينادي، وبينادي...

والبيه خارج يبطل عليهم من فوق كراماته، يبطل عليهم من
بلكونته بنفس الطيبة المعهودة.

وبأدب الدنيا، الشيخ مسعود رافع ايده لجل ما يسمح ليه البيه
بالكلمة... والشيخ مسعود ومعاه الناس طالبين الإذن من البيه
علشان ياخدوا بتارهم م العمدة.
والناس تهتف وتقول:

"يموت.. يموت... يموت".

والبيه طيب، يحافظ ع البسمة اللي في وشه وبيوافق بعد ما
بيفكر حبة وبيقول:

"يستاهل... راجل ظالم وضاللي ومجنون"

والبيه يستنى شوية ويسأل:

"مين راح يبقى عليكم عمدة؟"

والناس تتلفت حواليتها.. واقفه بتسأل بعضها:

"أيوة صحيح، مين راح يصبح عمدة علينا؟"

الناس حيرانة وفي عيونها كلام للشيخ مسعود، والشيخ مسعود
رافض أي كلام في الموضوع وبيصرخ فيهم:

"محدث علمهالنا ف الأزهر يا اخوانا، وغلاوة سيدنا الراجح ما
أعرف تتكتب إزاي كلمة عمودية".

والناس من تاني بتتلفت حواليتها.. بتدور على حد يوافق.

ومن يومها وتعلم شعر عشان أحبك زي كلام الشاعر ف الأوضة
بتاعة الناظر.

هاه... فاكراي؟

يا نهار يا ولاد... برضك مش فاكراي؟...

كده برضه يا مصر وهنت عليكي؟

بس إزاي مش فاكراة؟

أيوه صحيح ما لمحتش صورتى بتفاصيلها جوة كتاب الأبله رباب،
ولا حتى لاقيتك كاتباني هناك جنب الناس الـمالو هدومهم اللي
بنوكي وعلوا في سيرتك وحموكي.. بس أنا برضك واحد منيهم،
واحد م اللي بيرسموا بالاحمر براويز حوالين الصورة، وأنا أصلاً
واحد من دمك، غصبن عني صاحي ونايم شارب من همك، غصبن
عن عمري قالولي: "انت وعمرك ليها".

فكتبت الصك بإيدي اللي بقولك فيه إني ابنك، حقك، بتمنى أتمرمغ
في ترابك، واتمنى أكون خط صغير في الصورة المرسومة لوشك.

طب فاكراة؟

قعدت سنين وسنين أدرس فيك، في تاريخك، في الأرض اللي
بتشرب من نيلك، والتانية اللي بتستنى الدنيا اللي بتشتي لجل
الأصفر يخضر ويرسم خط بطول الشوق لعنيكي.

قعدت سنين أدرس في البحر المالح والنيل الحلو، وف تحت الأرض وفوقها، وادرس في وشوش الناس من برة وف جتتهم من جوة، وف شرع الله اللي بيحكم جوة ضميرك بين الخير والشر. واتعلمت الرسم...

فاكرة أما قالولي: ارسم

فرسمت ف كراسة الرسم واحدة بتشبه ستي فهيمة فوق سجادة الصلاة رافعه إيديها وبتقول بعنيها: "يارب" ودموعها بتحفتر ترعة كبيرة بتروي الجنب الثاني من الورقه بتاعة الكراسة. والترعة بتحرسها الشجرة الخضرا، وبتحضر صياد وشه بيشبه عمي فاروق، وعيال عريانة نازلة تبلط ع الجنبيين، ودائرة ملوئها بلاصفر برسمها فوقهم واربطها بقعر الصفحة بعشرين تلاتين خط بيتخاصموا لجل اما يوزعوا في النور ع الدنيا من أول ستي فهيمة ف جنب الصفحة، ولحد الجنب الثاني اللي استهلبت وحطيت وسطيه الواد فارس لابس لبس العسكر، رافع بايديه نبوت شبه اللي بشوفهم ف ايدين الغفرا، وبيكبر بحروف مكتوبة وبينادى باسمك وحياتك.

ورسمت ف زفة مولد، ورسمت المعزة، ورسمت ف وش لبني آدم وكتبت فوقيه "عب ناصر"، ما انا أصلي ما شفتوش غير في لسان الناس.

فاكرة؟...

أول ما نهيت الرسمة وقفت ورافع في الكراسية بإيدي لجل أما تشوفني الأبله ربيعه، وقلت بملو الصوت: "أنا خلصت".

والأبله تبص على الرسمة وقرفانة وتزغولي تقوللي: "إيه ده؟"

وبرد عليها ولسايا فرحان: "دي مصر يا أبله".

والأبله تمدني على رجلي وتضربني فوق ظهر صوابعي، وتشخط

فيا: "مصر؟.. لهو أمثالك حيشوفوا مصر منين؟.. ارسوم حوش

المدرسه يا حمار".

عطت..

ولاقيتك واقفه قصادي، ملاك راسم على وشه الرسمة اللي الأبله

ربيعة رمتها من الشباك، ولاقيتك زي عوايدك بتبسميلي، واتخيلتك

شايلاتي وحضانتي، وبتقوللي: "ولا يهكم".

هاه، فاكرة؟... إزاي مش فاكرة؟.

طب فاكرة أما قالولنا حتطلعوا رحلة لمصر؟، والمديرية حتبعت

للمدرسة توموبيل يبجي قد القطر، والتوموبيل حيوديكم ويجيبكم.

فاكرة أما كسرت الحصاله وعديت الشلنات الفضة وقلت لنفسى يا

واد يا مقامه هو يصح يا طحش تشوفك مصر لأول مره بلبسك

ده؟، طب حتى اشتري جزمة جديدة أو حتى كاوتش عشان

ماتوسخش البندر.

أول مرة ف عمري أنام جواكي، أول مرة أحس إن البيه الراجح
ملهوش لازمة، إني ف حصنك أحسن بكتير م الناظر ومن العمدة.
كل الناس نصحوني قبل ما اجيئك إني ما بصش ع النسوان
السارحين ليل ونهار ف شوارعك.

فى بلدنا الجدعان كانت بتقول: "نسوان مصر يودوا النار".

فكرة أما لاقيت الناس فى الجامعة بتهتف بحياتك وبتتخاق ويا
الغفرا بتوع البندر؟ بصيت ولاقيت واحدة من الزملا بتمسك إيدي
وبتقول لي: "ارفع راية واهتف ضد الظلم".

ومشيت وياهم ووراهم، وشوية لاقيت التلاميذ واقفين ف صفوف
بيصلوا صلاة الغايب على روحك، واستغربت كثير، بس وقفت
وصليت وياهم.

وشوية وزادوا العسكر، غفرا كثير لابسين أسود ف أسود،
وسوادهم مش زي سواد الحزن، شايلين نابيت أكبر بكتير من
نابيت غفرا النقطة.

يومها عاتبتك من غير ما أتكلم...

ليه بتخللى الحراس يلبسوا لسود؟، ولية تخليهم زي ما قالوا
يخافوا عليكي من التلاميذ؟، ليه حد يخاف من ولده الخارج من
جوة حشاه؟، حد يا خلق يخون ويموت روحه بروحه؟.

ساعتها دماغي خدتي لصورة روح الكلبة اللي اختارت عتية دارنا
عشان تهرب من غدر النبابت الميري..
فاكراها؟.. أكيد فاكراها.

ف لاقيتني بشيل ويّا التلاميذ الـ حواليا رايات مكتوبة بلون الذل،
ولاقيتني كمان بهتف وياهم، ولاقيتني بقول للعسكر وأنا بضرب
فيهم: "عمر ولادها ما كانوا كلاب، سيبوا العدل يدق الباب".
وزمايلي ولاد الكلب شالوني على اكتافهم، عملوني زعيم.
وخدوني العسكر..

طبعا فاكرة.. فاكرة الكرابيج السوداء وصرخة مصلوب على باب
الحيرة وألف سؤال بيدق في راسه وألف لسان بيعيط جواه وينادي
عليكي.

ولأول مرة أنادي عليكي ومترديش، ولأول مرة بيعط وما تمسحش
دموعي البسمة اللي ف وشك.

كده برضه يا مصر وهنت عليكي؟

شكلك لساكي بتفتكريني..

شكلك محتاجة أحكيك عنها؛ عن بنوّة لاقيتها بتحضن رسمة
صورتك في عنها؛ عن بنوّة قالتلي ف يوم:
"جرب مره تنام متعري وتستتر أحلامك بعلمها وفكر فيها".

شكلك عايزاني أحكيك عنها كمان، عن فستانها الواسع الاخضر،
عن شعر بيداري في جوف الليل لجل أما ينور عين الحبيبة، عن
همس رموش بتضل بصتها وطلتها ف وش الخلق.

شكلك محتاجة أحكيك عني أما دخلت الجيش ولبست الميري..
عني أما اتدهولت ف راسي وقلت أتجوز..
عن حلمي اللي ادارى ف وسط الزحمة لحد أما نسيت تجاعيده..
عن أكبر حدوتة ف جوفي اللي بتحكي عياط الليل على خد كلامي
المتدوق...

شكلك لساكي بتفتكريني !!!
وعارفك بتحبي الحواديت !!!
حستنى ثواني ف عمرك وارجع من تاني أحكيك حواديت..
يمكن ... يمكن نتقابل مرة ف حضنك، وتأكد إنك لساكي هناك،
جنب الروح.

أرجوكي استني الحواديت.



لست قاصاً ولا روائياً ولا حنّاءً ولا شاعراً...

فقط أجسد تأملاتي في ثوب يُصطلح عليه

ويتقبله الآخرون

مراد فاخر

murad_3li@yahoo.com

n

١١	§ المقدمة
٢٥	§ الحدودة الأولى
٣٥	§ الحدودة الثانية
٤٧	§ الحدودة الثالثة
٥٥	§ الحدودة الرابعة
٦١	§ الحدودة الخامسة
٧٣	§ الحدودة السادسة
٨١	§ الحدودة السابعة
٩١	§ الحدودة الثامنة
٩٩	§ الحدودة التاسعة
١٠٩	§ الحدودة العاشرة
١١٧	§ الخاتمة



(+٢) ٠١٨٨٨٠٠٦٥ (+٢) ٠٢٢٧٢٧٠٠٠٤
www.shams-group.net